

1402
LE FORT
ET PVISSANT
BOVCLIER
DV
PARLEMENT.
ENFORME D'APOLOGIE.

DEDIE'
AV ROY.



A PARIS,

M. DC. XLIX.



LE FORT ET PVISSANT
BOVCLIER
 DV
PARLEMENT,
 En forme d'Apologie.
 DEDIE' AV ROY.



En vn temps auquel vos bons Ministres selon les maximes d'une Politique mal-heureuse, pouuoient profiter à vostre desauantage de la malice des meschans, s'ils eussent eu moins d'amour pour leur Prince, que d'intérest pour leurs personnes: ils n'ont point eu d'autres pensées que de résister à leur fureur, & de s'opposer puissamment à leur violence: Estant dans le corps de vostre Estat ce que les yeux sont dans le naturel & l'humain, ils n'ont pas voulu ignorer leurs obligations en ce rencontre; mais estans tres bien instruits que le propre de ces deux Astres est de voir toutes choses sans s'appercevoir eux-mesmes, si ce n'est par reflexion. *Oculi omnia vident seipso non vident*: Ils ont à leur prejudice, & sans craindre ny les prisons, ny les chaines, ny toutes les autres cruautéz & chastimens dont on menassoit hautement tous ceux qui entreprendroient de vanger l'injure qu'on faisoit à la Patrie: Ils ont comme les Astres de ce Royaume, comme les Flambeaux éclatans & lumineux de cet Empire, comme les yeux de ce Corps si Monarchique, esté principalement attachez à leur chef: ils l'ont considéré sans se regarder eux-mesmes, ils se sont oubliez pour

ne songer qu'aux intereſts de voſtre Majeſté, & les maintenir contre les attaques & les violences de ceux qui en meditoient la ruïne: ny la perte de leurs charges, ny l'interdit de leurs fonctions, ny l'emprisonnement de leurs perſonnes, ny la deſpoüille de leurs biens, ny la perte de leur vie n'a point ietté dans leurs eſprits invincibles, & genereux ces terreurs panniſques qui appartiennent aux ames laſches, & qui d'ordinaire font des brèches ſi notables ſur les cœurs des plus conſtans, qu'ils les obligent ou à trouver quelque changement, ou à apporter quelque mal-heureux lenitif à leurs délibérations, & à leurs conſeils: leur innocence les a munis & fortifiez contre toutes ces craintes, & ils ont meſpriſé toutes ces menaces, ſçachant qu'ils ſouſtenoient la cauſe de celuy à qui ſeul en appartenoit l'exécution: car de dire & ſe vouloir perſuader que la ſeule conſideration du bien public leur ait fait fermer les yeux à tant de choſes qu'ils pouvoient apprehender: Leurs conditions & leurs charges nous pourroient bien donner ces ſentimens, puis qu'ils ſont les Peres des peuples: mais ces meſmes charges & ces meſmes conditions les eſtabliffant dans vn degré d'obligation indiſpenſable de conſiderer le bien public, non ſeulement en ſoy, mais par rapport au particulier, celuy du peuple par rapport à celuy du Prince, qui en eſt la cauſe, le fondement, & la ſource. Ils ont eu particulièrement eſgard, SIRE, à voſtre propre conſervation, & à la deſſeſſe de voſtre autorité: ils ont agy principalement pour voſtre gloire, ſçachant qu'ils auroient rendu les peuples aſſez heureux, ſi eux-mesmes ils l'eſtoient ſi fort, que de vous faire triompher vne fois de l'inſolence & de la fureur de vos plus cruels ennemis: Que ſ'ils ont eu quelque veuë d'eux meſmes dans cette affaire, ils n'en ſont pas condamnables, ils le deuoient, ils ſont entre le Souuerain & les Suiets, entre le Prince & le peuple la meſme choſe que ſont les Preſtres entre Dieu & les hommes; ils ſont le lien ſacré, le nœud & l'aſſemblage de ces deux extrêmes ſi differens, & vouloir les deſtruire, c'eſt rendre l'un & l'autre mal-heureux. Ils ont donc eu raiſon pour les maintenir tous deux de ſe conſerver eux-mesmes, puis que c'eſt le ſeul moyen de les faire ſubſiſter. Ils ſont le col qui porte toutes les influances du chef à toutes les autres parties, & ce col doit eſtre ſemblable à celuy de l'Eſpouſe; il ne doit point eſtre ſans heaumes, ſans rondaches, & ſans boucliers: *Mille clypei pendent ex ea;* des boucliers, & non pas d'autres armes; eſtant ſeulement leur deuoir de ſe deſſendre, & non pas d'attaquer. Ils ſont les Anges tutelaires de ce Royaume, ils doiuent donc en calmer les orages & les tempeſtes. Ils ſont les Pilotes & les

Nochers

Nochers qui tiennent en main le timon de cét Empire, il faut donc qu'ils l'exemptent des escueils & des naufrages. Ils sont ces Lions qui environnent le Trofne du plus sage des Princes, c'est donc à dire, que dās les occasions ils doiuent vomir les feux & les flāmes d'vne iuste colere. Ils sont ces vaillans & ces forts, qui au dire de l'Espouse en son Cantique, sont au tour de la couchette & du liēt Royal de Salomon, & ces forts ne sont pas sans espée; *Vniscuiusque ensis super femur*. Tout cela signifie, S I R E, qu'ils doiuent estre armez pour la deffense de vostre Majesté, & contre les vsurpateurs de vostre puissance.

Pourquoy donc, S I R E, les blasmer de l'auoir fait? cē sont des nuages de calomnie qui les inuestissent de toutes parts, & qui ne se font dissipées que lors que vous serez en vostre Orient: Qu'ont-ils fait autre chose que de satisfaire, & à la Nature, & à l'Euangile, imitāt la prudence du serpent, qui a particulieremēt soin de sa teste lors que l'on n'en attaque que le corps: On vouloit d'vn mesme coup abattre le Prince, les peres, & les peuples; mais ce Senat Auguste a ietté ses premieres pensées sur vostre Maieité, S I R E, comme sur le Chef d'où il tire ses plus benignes influences. Il faut repousser la force par la force, & sans violer le precepte (puisque c'est vne Loy & humaine & diuine, qui ne peut estre enfreinte sans vne lascheté honteuse, & vn crime punissable.) Je peux oster la vie à celuy qui est si mal-heureux que de me la vouloir rair; c'est vn cas décidé il y a long-temps: le Fils de Dieu l'autorisa dans sa prise, ses ennemis l'approchent à main armée; pour obeir, & donner appuy à cette maxime du Droit naturel & des gens, qui nous ordonne de nous deffendre, il renuerse les soldats; mais en mesme temps pour ne point faire tort à son amour, qui le destinoit au Sacrifice, & qui pretendoit faire éclatter dauantage sa Bonté que sa Puissance; apres cette cheute il les releue: c'est vn temperamment de bonté & de rigueur, qui a esté parfaitement imité de nos Magistrats.

Ils ont long-temps souffert, S I R E, la vexation & la tyrannie auparauant que de se plaindre, ou par la crainte d'empirer les choses au lieu de les adoucir, ou par l'esperance d'estre quelque iour affranchis de tous ces maux, & de voir leur patience victorieuse de l'oppression de leurs Tyrans: Le Marquis d'Ancre en ietta les fondemens, le Cardinal de Richelieu continua, & Mazarin natif de Sicile, & Sujet de vostre ennemy a posé le toit & acheué cēt ouuillage. Vostre Maieité se peut faire instruire comme dès le commence-

ment de la Monarchie on n'a iamais pû prendre aucune resolution importante à l'Estat, sans assembler ces fameux personages, qui ont receu leur puissance & leur autorité dès la premiere race de vos Peres, & qui ont receu leur nom de Louys X. lors qu'il institua leur siege dans la premiere de ses Villes, & la Metropolitaine de vostre Estat; & neantmoins tous ces trois Sectaires & mal-heureux reiettons de la race Machiaveliste voulant former vn nouuel ombre de puissance pour en destruire le corps, ont impunément violé les Loix sacrées & augustes de vos Maieurs, & encore dans le regne de vostre Pere, ostant aux deposts sacrez de sa Couronne & de la vostre, la connoissance qui leur appartient solidairement de tous les Edicts, Declarations, Ordonnances, & volonte des Souuerains, tant pour le fait de la Iustice que des finances & des armes. Vos Predecesseurs, S I R E, n'ont iamais rien entrepris d'innouer sans leur consentement; & ces trois Fauoris ont eu l'insolence de porter plus loin leur pouuoir, & abusant de celuy qu'ils tiroient de vostre Trosne, & dont ils estoient redevables & tributaires à vos Maieitez, ont tout entrepris sans eux, ont fait violence à la liberté de leurs suffrages, ont cassé leurs Arrests, & se mocquant ou de leur moderation ou de leur refus, ne pouuant faire sur leurs sentimens aucune atteinte par leurs inuentions detestables, ils ont passé outre comme s'ils eussent esté tout à fait independans; Les Roys ont tousiours deferé aux tres-humbles remonstrances, & aux plaintes que le Parlement leur a fait de la part de tous les Estats, & ceux-cy les ont tousiours mesprisées.

Le dernier, S I R E, a surmonté les deux autres, sa tyrannie a esté plus cruelle, sa barbarie moins supportable; car encherissant par dessus eux, apres auoir ruiné vos peuples, il s'est attaqué & à vos Magistrats, & à nos Peres, il s'est resolu encore d'en opprimer la liberté, d'en affoiblir la puissance, establisant de nouueaux droits & leuées par Arrest du Conseil contre les formes du Royaume, & Ordonnances de tous nos Roys, & luy en ostant la connoissance par vn ordre inusité en France, & contraire aux Loix fondamentales de l'Estat: Le Parlement ne prend point d'autres armes que celles de la douceur & de la clemence; il se plaint, il supplie, il remontre, donne des Arrests, aduertit la Reyne vostre Mere des obseques prochaines de cét Empire; mais on luy oste la lumiere, ce mauuais Ministre vse de sa bonté contre sa bonté mesme; il interdit, il emprisonne, il esloigne, il bannit, & contre les Loix fondamentales du Royaume,

qui deffendent les emprisonnemens violens en des Prouinces estrangeres, il relegue sur ses frontieres les premiers de ce Senat Auguste; adjouste l'horreur & l'incommodité du temps à l'incommodité & l'horreur du supplice, les fait partir au milieu de la nuit, & employe le poison pour leur faire perdre la vie au milieu de leur esclavage, & de leur bannissement. Et pour cela, SIRE, (vostre Majesté le pourra elle bien croire) il se sert de l'image & du caractere de vostre Majesté, il abuse de vostre Sceau; & comme vn autre Aman dans la Cour d'Assuere employa le cachet de ce Prince pour perdre toute la race Iuifue, & mesme tous les plus grands qui estoient soumis à sa Couronne; celuy cy se sert du vostre pour faire iouer ses machines, pour abattre le Rempart de vostre authorité, le Sousten de vos conquestes, le sacré Depositaire de nostre salut, & de vostre repos; pour rompre le lien & la chaisne qui vous vnit avec vos peuples; pour perdre cét illustre Senat, qui a fait de si grands biens à l'accroissement de vostre Estat, & à la splendeur de vostre Empire: Qui a fait perdre à l'Anglois la Souueraineté qu'il pretendoit de la Guyenne, en le condamnant de pur crime de felonnie: Qui a maintenu la Loy Salique contre l'imprudente Declaration de Charles VI. qui adjugeoit la Couronne de France aux Anglois: Qui a iugé nulle la cession que François I. fit à Charles V. de la Duché de Bourgogne, aux droicts de la Maison d'Orleans sur le Duché de Milan, & au Royaume de Naples & de Sicile: & qui a rompu les choses illicites, à quoy il s'estoit obligé; cette cession estant violente, à raison qu'il ne l'auoit faite que parce qu'il estoit son prisonnier: Qui a reünny le Duché de Bar à vostre Majesté sur le Duc Charles de Lorraine, à faute de foy & d'hommage: Qui a resisté aux Papes ennemis de la France, approbateurs des injustes vsurpations de la Navarre par Ferdinand Roy de Castille: Qui a chastié les Legats du saint Siege, qui venoient fulminer des interdicts contre la France: Qui a puissamment deffendu les droicts de l'Eglise Gallicane: Qui s'est enfin roidy contre ceux qui ont eu l'audace que de vouloir transporter par vne alliance pernicieuse vostre Trosne en Lorraine, pour le faire passer par apres plus commodément en Espagne.

Voila, SIRE, les attentats de ce mauuais Ministre, voila les objets de sa cruauté & de sa fureur: Mais voicy la patience de ce Parlement celebre, il souffre ce traitement l'espace de cinq années, pendant lesquelles abusant de la bonté de la Reyne vostre Mere, & de celle de nos Princes, il s'est rendu par leur tolerance si puissant, qu'il

a disposé à son gré tant des personnes sacrées de vos Maiestez que des plus grands de vostre Royaume; que luy seul a esté administrateur des affaires de la guerre, des finances, & de tout vostre Estat, dont il n'a pas si tost pris en main le Ministère, qu'il a fait prendre le Duc de Beaufort, chassé le Duc de Vendosme son pere, esloigné sa femme & ses enfans, banny les Princesses, donné des gardes au premier de vostre Cour, changé celles de vostre Maiesté, dont pour disposer luy seul, il se fait le sur-Intendant de son education, afin d'auoir suiet de loger dans son Palais, luy donnant pour ses Gouverneurs des gens à sa deuotion, pour en former l'esprit sur ses principes, ou en destruire la bonté par la corruption de ses maximes. Pendant tout ce temps il se rend si absolu, qu'apres auoir fait vne profusion estrange des finances de vostre Maiesté, auoir ruiné vostre Royaume, transporté vos reuenus en d'autres pays, appauury vos peuples par milles oppressions & surcharges, & tiré de ses veines iusques à la derniere goutte de son sang, pour fortifier ses Cabalistes & ses Supposts, apres auoir rendu la France sans commerce, les Villes desolées, le plat-pays exposé aux vols & aux assassins, tout l'Estat à son ambition infame, & à l'auarice insatiable des Partisans, les Marchands sans trafic, les armées sans argent, & sans secours, il passe encore plus outre: Il retranche, S I R E, les gages des Officiers de vostre Maiesté, casse les priuileges de vos domestiques, oste cette fidelle compagnie de Mousquetaires, la plus seure garde de vostre sacrée Personne, laquelle il affoiblit pour renforcer la sienne. Il remplit toute la Cour de gens de son pays en si grande abondance, que l'on la prendroit moins pour la Cour de France que pour celle d'Italie: Il fait perir par vne intelligence secrette, qu'il entretient avec les ennemis, les Regimens & Compagnies tant de cheual que de pied, dans les armées estrangeres; flestrit nos Lauriers, reduit nos Palmes en cendres, arresté le cours de nos victoires, retardé la gloire & l'heureux succez de nos combats, & fait perdre quantité de batailles ou faute d'argent, ou manque de secours, ou par vn ordre exprés de ne pas attaquer, & vn commandement de ne pas vaincre: il traite les Nobles comme les roturiers, il met la Noblesse à la Taille, & tout le monde à la besace: Et pour comble d'insolence, pour oster la connoissance de sa mauuaise administration, & nous rendre malheureux avec moins de resistance, il se ruë sur le Parlement, & s'attaque aux Cours Souueraines, les suspend, les interdit, les exile, les emprisonne.

Que fait le Parlement, S I R E, il essaye par les mesmes voyes de clemence & de douceur à s'opposer à la rapidité de ce torrent, car estans conuaincus que le mal seroit sans remede, s'il le laissoit si long-temps sans secours, & qu'il alloit tous les iours iettant de si profondes racines, qu'à la fin il seroit impossible de le destruire, il prend resolution de s'y enir. Mazarin estimant que cette vnion de toutes les Compagnies, qui ne tendoit qu'à remedier aux abus par les moyens les plus sages & les plus moderez, estoit absolument sa ruine, s'y estant opposé par des menaces & des violences inutiles; il fait mine de plier, il reçoit les remonstrances, il aggrée les assemblées; & voyant quel'on commençoit par la reuocation des Intendans des Prouinces, il prie quel'on retardel'execution de cét Arrest, Monsieur le Duc d'Orleans en demande la surseance; & ayant contre les coustumes fait venir en son Palais des Deputez pour conferer, il amuse nos Magistrats par de belles promesses: Le Chanceliers'engage de faire vne Declaration conforme à cét Arrest, le Parlement se soumet; & le lendemain Monsieur le Duc d'Orleans, Oncle de vostre Maiesté, en apporta vne, mais bien differente de son original, ne faisant aucune mention de la dissipation des finances, & ne parlant au lieu de la quatrième partie des Tailles, que de la huitième, & cela encore avec des conditions si onereuses, que cette décharge estoit moins aduantageuse qu'inutile & importune. On ne manque point, S I R E, d'en refuser la verification: ce refus n'aggreant pas, donna l'inuention de suppléer à son defect par l'establissement d'vne Chambre de Iustice: On le propose dans vne seconde Declaration dont l'on chargea encore son Altesse, pour la porter à la Cour. Ces Argus clair voyans, ces Lynx tous pleins d'yeux & de lumieres en eurent assez pour reconnoistre que c'estoit vne fourbe & vne inuention pour sauuer ceux qui auoient tout perdu; neantmoins dissimulant encore cette fois, ils fléchissent pour ne pas rompre, & pour auoir plus de liberté de soulager la misere des peuples, par leurs deliberations & leurs conseils. Leur douceur, S I R E, ne fut pas imitée, ils ne receurent pas tant qu'ils donnerent; ils accordent tout ne pouuant rien refuser; & les Ministres ne manquent pas de s'opposer à tous leurs Arrests de Police, & de la reformation necessaire à vostre Estat.

Pour cela, S I R E, Mazarin vous faisant le Ministre de ses mechancetez, & de ses fourbes, vous fait prendre s'ance en vostre liët de Iustice, avec vne Declaration en main qui n'estoit qu'vne illusion

continüelle, deffendant aux Compagnies de plus s'assembler que par vostre autorité. Mais voyans que vostre autorité mesme dont il pretextoit cette deffense, & auoit iusques alors pallié sa tyrannie, estoit extraordinairement choquée, ils ne font point de scrupule de contreuenir à ces ordres, pour examiner de près, & expliquer cette Declaration inique & frauduleuse avec la liberté de leurs suffrages : Cette genereuse resolution iette les aggresseurs dans l'interdit, estonne les Autheurs de ses diuisions, ils se desesperent de voir que leurs fourbes sont reconnues ; & croyant que le seul expedient qui leur reste est la cruauté & la fureur, ils se resoluent d'enleuer du Parlement ceux qui leur faisoient ombrage, & s'opposoient à leurs entreprises : ils se seruent de l'occasion d'une victoire pour contenter leur rage, ils ioignent la fureur avec la pieté, l'ingratitude avec la reconnoissance, les lauriers avec les chaisnes, les cyprez avec les palmes, & troublant les acclamations populaires d'une illustre bataille gagnée sur les ennemis, lors que l'on acheue le *Te Deum*, ils emprisonnent les plus gens de bien de nos Senateurs : Mais leur esclavage, SIRE, ne dura pas long-temps, car la populace s'estant souleuée à cause de cette capture sacrilege, & de cet execrable attentat ; les Autheurs de cette action inique furent contraints de les remettre en liberté, & les ramener triomphans.

Le Parlement, SIRE, pouuoit dès lors se servir de l'occasion, & ayant deux cens mille hommes sous les armes pour arrester la fureur populaire qui alloit mettre tout en desordre, s'ils ne les eussent prises, il pouuoit se vanger de cette conspiration par la perte & l'extermination entiere de tous leurs conspirateurs. Neantmoins, SIRE, il se contente de l'affranchissement des esclaves, & de la restitution que l'on leur fait, quoy que contrainte & forcée, de tous leurs prisonniers ; se persuadant qu'ils les vainqueront moins par le fer & par les armes, que par la patience & la douceur ; mais ils se trompent, tant s'en faut que cela amollisse leurs cœurs, qu'au contraire cela les endurecit dauantage ; ils ont veu avec combien de zele cet illustre Senat a calmé la sedition, a leué les cantonnemens & barricades, a destendu les chaisnes, a remis les esprits en leur premiere affiette, a fait baisser les armes, & rendu tout l'Estat pacifique. La Reyne vostre Mere, SIRE, en a admiré les soins, reconnu l'affection & le zele, promis de n'en perdre iamais la memoire, de s'en ressouuenir eternellement, tesmoigné qu'elle n'a plus de cœur que pour Paris, & qu'elle va reconnoistre cette obligation qu'elle a à

cette Ville par vne Paix generale. Et neantmoins apres ces belles promesses , apres ces sentimens d'admiration , de loüange, d'affection, de reconnoissance, de remerciement : on vous enleue, S I R E, au milieu de la nuit, sans tambour, sans trompette, & sans la suite & l'appareil digne d'une Majesté Royale, comme si ce larcin & ce vol n'eust pas eu assez d'horreur par la seule circonstance de vostre personne sacrée, sans y adjouster encore celle du temps, & de vostre equipage. Cét enlèvement, S I R E, ne manque pas de ieiter vne consternation generale dans les esprits de vostre peuple , il se lamente, il crie, il pleure, il se rend inconsolable, il redemande son Roy, & cependant personne n'est capable de cette restitution que celle qui vous ayant obtenu du Ciel, ne devoit point vous refuser à la terre, & laquelle apres vous auoir donné par miracle, estoit encore obligée de vous rendre à nous-mesme par iustice : On l'en prie, on l'en cõjure, le Parlement touché de compassion & de pitié par les gemissemens de vostre pauvre peuple, se transporte à Ruel, prie la Reyne vostre Mere de retourner à Paris, & d'y ramener vostre Majesté qu'un mauuais Ministre nous auoit enleué, avec dessein de mettre le trouble dans vostre Estat, pour obliger vostre ennemy, dont il est le Pensionnaire & le Sujet: mais elle change ses premiers sentimens en d'autres bien differens & bien estranges; auparavant elle admiroit, maintenant elle rebute; elle loüoit, elle blasme; elle estimoit, elle mesprise; elle se ressouuenoit, elle oublie; elle promettoit, elle menace; elle remercioit, elle condamne; elle change son admiration en reproches; ses loüanges en blasme, son amour en haine, son estime en mespris, son ressouuenir en oubliance, ses remerciemens en ingratitude, & charge la premiere Compagnie du Royau-me de mauuaises paroles & d'injures, apres ne luy auoir fait esperer que des reconnoissances & des biensfaits.

Le Parlement, S I R E, avec vne égale bonté effuye toutes ces disgraces & ces hontes; & scachant que ce changement si subit estoit l'effet de l'approche des armées & des troupes, dont le Cardinal dégarnissoit vos frontieres pour asseurer sa perte, maintenir le monopole dans son credit, continuer sans obstacle le pillage de vos finances, & s'opposer entierement à l'execution des bonnes Loix : Voyant que le mal s'augmentoit de iour en iour: Qu'il entretenoit la guerre par ses intrigues: Que les deniers leuez sous pretexte de la guerre ne passoient point les coffres: Que le peuple plioit sous la charge trop pesante des impositions & des taxes: Que les Tailles

estoyent tombées en party contre nos Ordonnances & nos Loix : Qu'il auoit volé tout vostre reuenu, engagé & r'engagé tout vostre Domaine : Qu'il vouloit faire vn fameux Hospital de toute la France : Que de tout vostre Estat il en alloit faire vne pure tyrannie ; mais sur tout qu'il obscurcissoit le lustre & l'esclat de vostre puissance , & ruinoit de fond en comble l'autorité Royale : Il est enfin reuenu de son assoupissement, & se ressouenant du pouuoir que vos Peres luy ont donné ; se ressouenant de ce qu'ils doiuent au Royaume & au Roy dās sa minorité ; qu'il est vostre Tuteur naturel pendant ce tēps ; Iugeant enfin qu'vne plus grande tolerance le rendroit coupable, il s'est resolu d'aller à la cause du mal & d'en sapper les fondemens. Ces resolutions, S I R E, estonnerent les injustes Protecteurs de ce mauuais Demon. Ces deux premiers Princes de vostre Sang, Monsieur le Duc d'Orleans & Monsieur le Prince charmez par cēt infame, escriuent au Parlement, le prient de surseoir leur deliberation iusques à ce qu'ils eussent conferé ensemble à S. Germain ; on leur accorde. Et quoy que l'on connuist assez que toutes ces conferences n'estoyent que des amusemens dont on se seruoit pour eluder l'effet de ces bons desseins, & donner loisir aux troupes de s'auancer : toutesfois il ne refuse aucune ouuerture d'accordement, encore que la Conference se deubt faire dans vn lieu où il estoit facile de les sacrifier à la vengeance & à la fureur de leurs ennemis ; Ils enuoyent des Deputez ; on parle ; on confere ; six semaines entieres se passent à recommencer tousiours la mesme chose sans rien conclure. Apres quoy enfin les oppresseurs de la liberté publique, se trouuent autant forcez par leur conscience que par la necessité, & les fortes & pertinentes raisons de nos Magistrats, d'arrester les affaires. Le tout se termine à vne Declaration : on la dresse : on l'enuoye à S. Germain, où ayant trouué vne estime & vne approbation commune, elle est renuoyée le lendemain au Parlement de mesme qu'elle auoit esté concertée.

Cette Declaration, S I R E, fut aussi tost suivie du retour de vostre Majesté, avec vne resiouissance generale, & l'acclamation de tous les peuples : Mais comme les ioyes & les contentemens de ce monde ne sont point si purs qu'ils ne soient detrempez de fiel & d'amertume, les Ministres qui conseruoient dans le cœur vne vengeance & vne trahison secrette, ne manquerent pas de troubler cette resiouissance commune. par le renuersement & la ruine de toutes les choses dont ils auoient esté les approbateurs ; Ils disent que cette

Declaration

Declaration est vne loy du temps, vn ouurage de la force & de la violence qu'on auoit exercée sur l'esprit de la Reyne Mere de vostre Majesté; & sous ce pretexte malicieusement inuenté, ils y contreuiennent ouuertement, par de nouuelles leuées, par des Commissions extraordinaires, par de nouveaux monopoles, & par des surcharges immenses & tyranniques. Les enfans, S I R E, n'eurent pas en ce rencontretant de patience que leurs peres: Le Parlement souffre, quoy qu'à contre-cœur, ces iniustices & vexations insupportables, & qui ne tendoient qu'à reduire toutes les choses dans vn plus horrible chaos que celuy dans lequel elles estoient enseuclies auparauant qu'il les eust restablies: Mais les peuples s'impatientent, & reclament l'auctorité des Loix contre leurs perfides infracteurs, qui y contreuiennent impunément. Cét auguste Senat ne peut point se dispenser d'accorder quelque chose à la voye publique. La premiere chose qu'il fait apres la S. Martin, à l'ouuerture des Chambres, c'est de commencer les assemblées pour remedier à ces desordres; Monsieur le Duc d'Orleans & Monsieur le Prince y vinrent prendre leur place, à la requeste & à la persuasion des faux Ministres, lesquels les ayant remplis tous de fiel pour ces personnes incorruptibles, & ayant porté le dernier à traiter de mauuaises paroles & de menaces quelques-vns de la Compagnie, iusques à leur oster la liberté de leurs suffrages, ne laisserent pas de conceuoir de bonnes resolutions: mais ces bonnes resolutions trauersées par le Conseil, auorrerent dès leur naissance, & demeurant sans execution, ne furent pas si heureuses que de voir le iour.

Chose estrange, S I R E! fait inoüy! horrible lascheté, & indigne d'un cœur de Prince! Il n'y auoit encore que deux iours que tous deux auoient protesté en plain Parlement, que la Reyne vostre Mere vouloit que la Declaration fust obseruée: Qu'ils estoient venus de sa part pour reconnoistre & punir les infracteurs, & la faire executer ponctuellement. Et neantmoins ils en portent vne autre à la Chambre des Comptes, toute contraire à celle qu'ils auoient approuuée, qui estoit l'ouurage de l'Enfer, & le dernier effort de la tyrannie. On vouloit par icelle que les Compagnies Souueraines, faisant seruir la Iustice à l'iniquité, autorisassent elles-mesmes les vols, les concussions & les pillages: & qu'apres auoir condamné les crimes couuerts, elles canonisassent avec scandale les publics & manifestes, dont pour oster l'horreur & accroistre l'vsage & la pratique, on en permettoit le commerce à tout le monde avec impuni-

té, sans crainte de perquisition, sans déroger à la noblesse, & sans contrevienir aux bonnes Loix. Toutes personnes, S I R E, ont pouvoir de s'engager dans cette vsure, dans ce funeste brigandage, dans ce honteux peculat. Mais comme Dieu qui est le Maître des Princes, & qui en sçait ruiner les conseils & châtier la malice, ne peut souffrir de tels abus, iniurieux à ses Loix & aux vostres, il ne manque pas de susciter aussi-tost le Clergé, lequel voyant qu'un tel ouvrage estoit contraire & aux Loix de Dieu, & aux Ordonnances de vos Peres; qu'il insinuoit la corruption des bonnes mœurs & du Christianisme, & qu'il aboutissoit à la ruine entière de tous vos reuenus & de vostre Estat, ne le voulurent point souffrir. Monsieur l'Archeuesque de Paris, & la Sorbonne arrestent ce poison, qui par son escoulement contagieux & si general, se preparoit à donner de si puissantes atteintes sur le corps & sur l'ame de vos sujets; que les tuant tous deux d'un mesme coup, l'un par le crime, & l'autre par la necessité & l'indigence, il eust remply les tombeaux de cadavres, les Prisons d'esclaves, les Hospitiaux d'infirmes, & tout le Royaume de pauvres, & l'Enfer de damnez.

Le Parlement, S I R E, tout du moins autant zélé pour la Maison de Dieu, que pour la vostre, s'oppose aux pernicieux desseins du Cardinal, lequel se voyant poursuivy d'assez près; n'estant retourné à Paris, & ramené vostre Majesté que pour prendre vne occasion plus favorable à ses desseins, & au party des Monopoleurs: Que pour esbranler les esprits des plus fermes au service du public: Que pour corrompre les plus affectionnez aux interets de vostre Maïesté: Que pour diuiser entr'eux les Officiers du Parlement, & negocier des intelligences secretes; voyant la mine éuentée, ses malices decouvertes, ses desseins contredits, apres auoir attiré de Flandre, d'Italie, & de Catalogne des troupes aux environs de Paris, fait distribuer des deniers aux Officiers de guerre pour faire des recreuës, enuoyé les ordres de tenir leurs troupes prestes au premier mandement, fait vn fonds de quatorze millions de la despoüille de vos troupes, & des gages de vos Officiers, pour le payement d'une puissante armée: enfin voyant tous ses desseins prests de réussir, voyant qu'il ne pouuoit voler vos finances, & y porter la dernière main; il vous vole vous-mesme, il porte derechef la main sur vostre sacrée personne, il enleue vostre Majesté de son lit: & pour la seconde fois, il vous emporte à S. Germain à deux heures apres minuit,

Monsieur le Prince y consent sous pretexte de recompenses imaginaires de quelques places que l'on luy promet en droict de Souueraineté, & dont l'on flatte son ambition naturelle; Monsieur le Duc d'Orleans ne goust point de prime abord ce procedé, la consideration de ce qu'il vous est par le sang le dissuade de tremper dans cét horrible attentat, & ce vol sacrilege; sa résistance fut grande par la connoissance de son deuoir, & la bonté de sa nature; mais comme il est facile, il se laissa entraîner par la Riuiere dont il est obsédé il y a tant d'années, dont il a esté trahy tant de fois, & dont les mœurs sont aussi corrompues, & aussi basses que la naissance.

Le pretexte quel'on prit, SIRE, pour pallier cét enleuement, & leur crime; ce fut de mander par vne Lettre de cachet: qu'il n'y auoit point dans Paris de seureté pour vostre personne: Qu'il y en auoit quelques vns dans le Parlement qui auoient de mauuais desseins contre vostre Majesté: Qu'il y en auoit qui entretenoient des intelligences secretes avec les ennemis de vostre Estat; que pour cela vostre Majesté auoit esté obligée de sortir de Paris: Cette calomnie, SIRE, ne peust aucunement esbranler la conscience irreprochable de cét Auguste Senat, lequel pour s'en purger apres vne assemblée tenuë pour ce sujet, deputerent à S. Germain quelques vns de leur Corps pour sçauoir les noms des accusez, s'instruire de leurs accusations, & leur faire leur procez; mais le silence des accusans, SIRE, fut vne assez ample preuue de l'innocence de ces personnes incorruptibles, & vne marque indubitable du dessein qu'auoit ce Cardinal de ietter de la discorde entre les Cours Souueraines, de fermer les passages, d'arrester les viures, de bloquer Paris, de le reduire à la faim, & à vne extrême necessité, pour diuiser le Parlement d'avec le peuple, pour perdre les vns & les autres avec plus de facilité, estans attaquez separément. Mais il se trompe, ils demeurent tous deux plus vnis que iamais; le Parlement apres auoir pourueu le premier iour à la seureté & subsistance de la Ville, ordonne de prendre les armes pour sa conseruation, pour s'ouuir les passages, pour repousser les gens de guerre, lesquels la veulent obliger par toute sorte de violence à rachepter la vie, la liberté, & le repos des habitans, abandonnant les plus zelez de leur Corps à la fureur des Ministres, pour leur estre sacrifiez comme de mal-heureuses victimes; La patience luy échappe mais ce n'est que pour se deffendre; & quoy qu'il deubt estre sensiblement touché des conspirations que l'on tramoit pour sa ruïne, pour auoir voulu seulement adoucir l'oppression publique, & guarir

les blesseurs de l'Estat, il ne voulut point encore vser de son autorité legitime; il se contente de donner vn Arrest contre l'Auteur de nos afflictions & de nos maux, le declare criminel de leze-Majesté, ordonne de sortir de la Cour dans vingt quatre heures, & du Royaume dans huictaine.

Cét Arrest, S I R E, fut suiuy des soins prompts & diligens. qu'apporterent avec toute sorte de moderation & de douceur ces fameux Magistrats pour le gouvernement non seulement de la premiere Ville de vostre domination, mais encore de tout vostre Royaume: on a sans eux fait des impôts & des leuées, on a supprimé leur puissance par vne autre illegitime, on en mal traite les plus notables, on en a injurié les plus vertueux, on en a banny les plus zelez, on en a emprisonné les plus fidels, on en a fait mourir les plus innocens, ils ont veu opprimer vos peuples, destruire leur liberté, desoler leur fortune, & en toutes ces choses, obscurcir le lustre & la gloire de la Monarchie Françoisé, & vous oster d'entre les mains l'heritage de vos peres: & on trouuera estrange qu'ils se soient opposez, S I R E, à ces pillages, à ces injustices, à ces violences, à cet attentat, & qu'ils ayent cherché les moyens de restabir vostre puissance sur les ruines de la tyrannie, & qu'aprest tant de Conferences, d'assemblées inutiles, & des traitemens injustes; ils s'efforcent & employent tout ce que Dieu, la Nature, leur naissance, leur condition, & vostre Sceptre leur a donné de forces pour maintenir vostre liét de Justice dans Paris, & empescher que l'on ne le transporte (selon la Lettre escrite au Procureur General, & au Preuost des Marchands) en vne petite Ville, ou par vne metamorphose estrange les coupables, prenant la place des innocens, & l'iniquité selon la vision de cet anciē Monarque, celle de la Justice, les voleurs eussēt esté les Juges, faisant les objets de leur cruauté & de leur fureur ceux qui le deuoient estre auparauant de leur apprehētion & de leurs craintes. Vostre Maieité, S I R E, trouueroit sans doute bien plus estrange s'ils n'en auoient vsé de la sorte, & ioignant la rigueur à l'humanité, la seuerité à la clemence, la verge avec la manne, le visage de lion avec la face d'homme, ayant vostre Couronne en depost, & estans responsables de vostre Estat ils ne l'eussent purgé par le feu de cet air contagieux, & de ces pestes mal heureuses pour le remettre sain, pur, & entier entre vos mains. Pour cela, S I R E, il donne des Arrests plus solempnels & equitables que ceux que les faux Ministres firent publier dans le marché de Poissy, & les lieux circonuoisins, defendans

fendans à qui que ce soit, sur peine de la vie, d'amener des viures à Paris, & d'y faire aucun trafic : & apres avoir armé tout Paris, ils essisent des Generaux, des Capitaines & Officiers, & font contribuer eux-mesmes & tout le Corps, tant pour la Subsistance de l'armée, que pour l'ouverture des passages. Ont ils mal fait, SIRE, de se conseruer? ont ils mal fait de resister à vn Tyran? ont-ils mal fait de nous secourir? ont-ils mal fait de vous deffendre, & de vous proteger? C'est pour ce sujet, SIRE, qu'ils ont pris les armes, & non pas pour leur interest, comme l'on les accuse : Car l'autorité des Iuges est comme la Verge d'Aaron, elle fleurit & fructifie sans humeur terrestre; elle est comme la Palme qui croist aux lieux les plus steriles, que le sel, les pierres, & le sable rendent plus belles : Ils ne sont point entracinez dans l'interest, si ce n'est dans le vostre, SIRE, puis qu'ils risquent tout ce qu'ils possèdent pour conseruer vos biens, vostre repos, vostre vie, vostre liberté, vostre puissance, & empêcher que vostre Royaume ne deuienne la proye de vos ennemis.

Cependant, SIRE, pourquoy trouuer mauuais que l'on vous donne des mains pour vous deffendre quand l'on se sert des vostres pour vous attaquer? Pourquoy gronder de voir des Iuges & des Magistrats qui sont (au dire de Plutarque dans ses Morales) le Sel des Republiques & des Empires, vouloir s'opposer à la corruption & à la ruïne du vostre? Pourquoy à raison de ces genereuses resolutions les vouloir despoüiller de la Iudicature, qui est vne dignité si glorieuse; que c'est la plus honorable recompense des Apostres pour auoir tout quitté, & suivy le Messie; *Sedebitis & vos indicantes*. Matth. 19. Pourquoy ne vouloir pas que les Peres donnent le pain à leurs enfans? Pourquoy des-agréer que les Cieux versent leurs benignes influences sur les corps inferieurs, & les priuer de leur lumiere, pour remplir la terre de vacuité & de confusion; *Aspexi terram & ecce vacua erat & nihil*: En voicy la raison; *Aspexi caelos & non erat in eis lux*. Ierem. 4. Pourquoy trouuer estrange, SIRE, que l'on empesche que l'on ne vous despoüille de cette Iustice, qui est au dire d'Isidore Pelusite, en vne exhortation à l'Empereur Basile, le plus honorable & le plus riche vestement des Roys; *δυνάστην ὅσον περ ἀληθινὰ ἐνδεδυμένον*. Pourquoy trouuer estrange que nos Iuges soient nos Defenseurs & nos Capitaines, puis qu'ils ont esté ainsi establis de Dieu? Pourquoy en vn mot blasmer ce que la Nature autorise, ce que vostre autorité commande, & ce qui ne peut estre refusé ny au Roy, ny au peuple sans injustice & sans crime. C'est de vostre bouche,

SIRE, que ces fameux personnages attendent la iustification de leur procedé.

Quoy, SIRE, auriez-vous approuvé la prophanation de la Justice, que les Grecs ont nommée la chose la plus sacrée du monde, & que les Hebreux ont appellée le fondement des choses les plus harmonieuses; au contraire, vostre Maesté sans doute n'estant pas moins Religieuse que ses Ancestres & ses Predecesseurs, auroit puny la lascheté de ses soustiens, s'ils auoient esté ou si mauvais, ou si foibles que d'en tolerer sans resistance la destruction & la ruine. Vostre interest, SIRE, vous en auroit inspiré les sentimens, estant comme disoit Homere, Iliad. 7. le premier de ses Senateurs, & le chef de tous ces hommes qui ne vivent que de lait, & n'ayant plus qu'un ombre de puissance si l'on vous despoüilloit de cette vertu; Car dit S. Augustin, que deuiennent sans elle les Royaumes & les Empires, sinon des retraites de voleurs & de brigands; *Quid sunt regna sine iustitia nisi mœra latrocinia.* C'est le propre de la Justice conseruant les suiets en paix, & les deffendant des guerres & des oppressions, de maintenir le Prince dans sa puissance legitime, laquelle s'évanouit & se dissipe en mesme temps que l'on luy en enleue le fondement & l'appuy: Les Roys sans Justice perdent leur qualité maestueuse, & comme Ulysse voguant sur les eaux estoit prest du naufrage lors qu'il quittoit la robe dont Calypsô l'auoit muni contre le choc des futures tempestes, ils sont abymeés sous les ondes du mal-heur quand ils en sont despoüillez: Sans elle, SIRE, il n'y a point de Roy: Dieu, (disoit Plutarque) ne peut pas faire qu'un homme soit Prince sans elle *sine iustitia quidem nec iouem posse principem agere*: Sans elle l'Estat ne peut pas persuerer; car l'Estat, dit ordre, l'ordre est contraire à la confusion, & il n'y a que confusion où cette Vertu ne se trouue point: car où la Justice manque, les Ministres tyrannisent, les Suiets se reuolent, les peuples se souleuent, les ennemis font des surprises, les Prouinces se rebellent, le commerce cesse, les Marchands font banqueroutes, les Laboureurs pensent dauantage aux moyens de se fortifier pour se deffendre, qu'à cultiuer la terre pour nous nourrir, tout le monde se plaint, tout le monde gemit, de sorte qu'en cette maniere il est impossible que le Royaume persuerer, il est impossible que la Monarchie subsiste: Sans la Justice la Principauté est vne pure tyrannie. Cette vertu, SIRE, est comme l'ame en l'homme, la teste au corps la forme au composé, & la difference dans la diffinition: Dieu mesme sans elle n'a point d'Empire: *Sine iustitia nec iouem quidem posse principem agere.*

Les plus sages Politiques, SIRE, mettent la Justice pour rempart contre la tyrannie & les violentes usurpations des Grands; & Platon disoit que ce tonant Phrygien ne pouuoit sans elle affermir son Empire: C'estoit donc, SIRE, le deuoir de cét illustre Senat de s'opposer en ce rencontre aux violences & aux cruautéz des faux Ministres, à ces allumettes de discorde, à ces esprits Catilinaires qui meritoient le feu pour auoir à l'aduantage d'un infame Sicilien cherché l'embrasement de leur Patrie; c'estoit à eux à esteindre cét Erostrate incendiaire du Temple de la Paix; à dompter ce Chameau qui ne boit qu'en eau trouble, à retenir ce Cancro qui regarde de trauers la prosperité de la France, à engourdir ce Veau-marin qui saute d'aïse parmy la tempeste & l'orage, à moderer ce Cameleon à qui la perfidie fait changer de couleur à tout moment, à temperer cét Assyrien mal-heureux qui n'adore que le feu des combustions ciuiles, & qui comme vn Pyrauste ne se plaît que dans les incendies, & dans les flammes: C'estoit à eux, SIRE, à seruir de barriere à la fureur & conuoitise de Mazarin, lequel ayant esté comme cét Ouillage & Marmouzet de Promethée formé de la lie & de la bouë d'une tres-vile naissance, & nouvellement animé d'un feu d'amour pris au chariot de la Lune, & tiré secrettement de son sein auëgle; estant enfin deuenu grand, & de Pigmée qu'il estoit, ayant pris la hauteur d'un Geant à la faueur de son Ministère, a déclaré la guerre aux Dieux, les voulant aneantir: Ils l'ont fait, SIRE, dans le dessein de maintenir l'autorité de vos Peres, & la grandeur de vostre puissance.

Le plus Sainct de vos Maieurs, SIRE, ne faisoit que de commencer encore à gouverner, que des esprits turbulens & seditieux fondez sur le basage du Roy, taschent à troubler la Monarchie, ils allument la guerre par tout le Royaume: Le Duc de Bretagne, le Comte de Champagne & de la Marche souhaitant s'establir sur son débris, se liquent ensemble, vnissent leurs troupes, & leur armée grossissant remplit le pays d'horreur & d'effroy. Vous estes, SIRE, l'enfant de ce Monarque, le fils de ce Sainct, le Successeur de sa Couronne & de son Sceptre, vous le devez estre de sa sainteté & de sa vertu dont les illustres idées, & les genereuses pratiques vous furent si agreablement inculquées en vne Chaire des plus celebres de Paris, par la bouche & l'organe de Monseigneur de Corinthe: Mais vous ne devez pas estre l'heritier de son mal-heur & de son infortune, il falloit que nos Magistrats voyant que des sa-

Dieux vouloient faire renaistre les mesmes troubles en vostre Estat, arrestassent le cours de leurs mauuais desseins; il n'y a point de malheur pareil aux factions & guerres ciuiles: *Factiones fuere eruntque magis exitio pluribus populis quam bella externa quam fames morbuè.* T. Linc. Ce sont des deluges qui bouleuersent & noyent les plus puissans Royaumes, & ils deuoient s'opposer puissamment à ce malheur pour en retenir la rapidité: Ils n'y ont pas manqué, SIRE; il est vray que ç'a esté ce semble avec plus de douceur & de bonté qu'ils ne deuoient, mais la Iustice qui est tousiours assaisonnée de clemence ne peut auoir plus de virellé & de rigueur; elle a vne espée, mais elle a vne balance; & cette balance, disent les Astrologues, est au Zodiaque, entre le Signe de la Vierge, & celuy du Scorpion: Elle est seueré, mais sa seuerité est douce; elle marche comme les Dieux quand ils chastient: *Dij pedes habent laneos.* Elle va lentement; c'est ce que nous ont signifié les Anciens par vne riche peinture; Ils peignoient la Iustice sur vn chariot de triomphe qui n'estoit traîné ny par des cheuaux, ny par des cerfs legers, mais par deux vieilles femmes qui ne pouuoient presque se soustenir, l'une portoit à la main vn baston sur lequel elle s'appuyoit, & l'autre vne espée rompuë; cela veut dire, SIRE, que la Iustice doit estre lente à punir, & que si elle a de la seuerité, cette seuerité doit estre douce; les Iuges doiuent vsfer de maturité en leurs iugemens; & ne se pas precipiter: Nostre Dieu & le vostre, SIRE, nous en donne l'exemple, quoy qu'il soit l'œil du monde; que rien n'échappe à sa connoissance; qu'il voye sans considerer; qu'il n'ait pas besoin de temps pour s'instruire, & que sans Arithmetique, sans regle, sans mesure & sans poids, il connoisse le nombre, la dimension, la valeur & la grauité de chaque chose, neantmoins l'impieté & la voix des crimes des Sodomites ayant monté iusques à son Throsne; & l'ayant irrité, il en differe le chastiment, & demande du temps pour s'en instruire; *Descendam & videbo.* Genes. 18. La clemence & la Iustice, SIRE, sont les deux principales vertus des Roys, le Prince ne doit rien tant aymer que la clemence, & n'auoir rien tant en horreur que la cruauté: c'est pour cette raison que les Souuerains sont appelez Pasteurs des oüailles, les Peres des peuples, & que les Romains appelloient leurs Empereurs & leurs Roys du nom de Sauueurs, ainsi estoient nommez les Iuges d'Israël, pour nous apprendre la necessité de la douceur & de la misericorde en leurs personnes.

La Iustice & la misericorde, SIRE, sont les deux Poles des Monarchies,

narchies, ce sont ces deux gardes inseparables du Roy Prophete, ce sont ces deux mains qui soustiennent le Throsne de Salomon, ce sont ces deux pieds de l'Ange de l'Apocalypse, ce sont les deux faces du Cherubin, ce sont ces deux Gemeaux du Cantique qui repaissent dans les lys; *Duo gemelli qui pascuntur in lilijs*, ce sont enfin ces deux mammelles de l'Espouse qui en sont la figure, mais la seconde doit l'emporter sur la premiere, & la Politique doit s'accorder en ce point avec la Theologie, qui nous apprend que Dieu ne fait iamais banqueroute à sa misericorde, & l'exerce mesme iusques sur les damnez: Que l'on n'accuse donc point nos Senateurs: Que l'on ne blasme point nos Magistrats de n'auoir pas esté si viste que la fureur populaire à repousser & punir la violence d'un faux Ministre, & à donner des bornes à ses tyrannies insupportables à vos peuples, desaduantageuses à leur puissance, & fatales à vostre autorité. Le Iuge doit estre comme le Musicien qui lie & serre des cordes, & puis en lasche d'autres, dit Polierates l. 4. Il doit ioindre la manne avec la verge, & agir sans passion & sans fureur; C'est ce que nous represente cette poitrine descouuerte de cet homme armé de pied en cap, tenant d'une main un drapeau fait de pieces de soyes de toutes couleurs, au milieu duquel estoit peinte une rose pour deuise; & de l'autre une balance, ayant tout proche un ours, dans son bouclier un lyon, & ces mots aux pieds de la statue: *Dux ego gentis Saxonum victoriam certam pollicor venerantibus*, & sur la teste estoient ces trois paroles, *her, man, sal, vir, communis, conseruator*. Goropius Becan. & Artemius C'est, SIRE, l'expression naïue & naturelle de l'obligation de vos peuples, & du deuoir de nos Magistrats, que les Saxons nous ont fourny dans cette figure de leur Republique auparauant que d'estre subjugué par Charlemagne. Cette statue nous apprend, SIRE, qu'un Empire & un Estat doit auoir des forces & des armes pour se deffendre des ennemis tant estrangers que domestiques. Cet homme armé est l'image de vostre Parlement, qui doit estre armé pour vostre deffense, & celle de vos Sujets: Qui doit auoir la force du lyon pour resister aux vsurpateurs de vostre puissance, & de nos fortunes: Qui doit auoir la hardiesse de l'ourse pour attaquer, & n'est-ce pas ce qu'il a fait: *Vrsi pugnaturi contra tauros supini iacent*, dit Plin. Il n'a combattu qu'en pliant, qu'en fléchissant, qu'en s'abaissant, qu'en se prosternant, qu'en suppliant avec humilité, qu'en se couchant par terre avec douleur, qu'en remontrant avec instance; *supini*, si le drapeau de diuerses couleurs monstre l'vnion des affe-

tions differentes en vne seule; il a r'allié en vne seule & attaché au bien du public les inclinations de nos Senateurs auparauant si diuerses & partagées à des intereſts ſi notables, & à des objets ſi differens. Il tient la balance en main puis qu'il ne prend les armes que pour deffendre la Juſtice & voſtre autorité; Mais ſur tout, SIRE, il porte la poitrine deſcouuerte dans la ſincerité de ſes intentions, il la porte deſarmée reſiſtant à ſes aduerſaires ſans aucune alteration; car ſça-
 chant, comme dit Seneque, au liure de la clemence, que les maſſacres & les carnages ſont auſſi honteux au Prince que le ſont au Medecin les funerailles & les obſeques; *Tam turpe eſt principi multa ſupplicia quam Medico multa funera*, eſtant de l'humeur de Scipion, qui ay-
 moit mieux ſauuer vn Citoyen que perdre mille ennemis, & voulant ſe faire reconnoiſtre par leur douceur (qui eſt l'appanage, le ſigne, le ſymbole, & le caractere des bons Miniſtres) d'avec ceux dont la rage qu'ils ont executé dans tous les maux qu'il nous ont fait ſouffrir, ſans en auoir iamais fait aucun, monſtre bien qu'ils n'en ont que l'apparence, & que c'eſt injuſtement & ſans raiſon qu'ils ſe vantent de ſouſtenir voſtre party: il n'a pris les armes purement que pour nous aller chercher du pain, pour luy donner paſſage, pour luy faire eſcorte, pour nous deffendre & pour vous conſeruer; nos ennemis s'en ſont moquez, SIRE, nous reprochant dans des Placarts & Libelles ſeditieux ſemez dans toutes les ruës de voſtre grande Ville par l'vn de leurs Heros: que nos troupes ne paroïſſoient point, qu'elles ne paſſoient point les Faux-bourgs, ou que ſi elles alloient plus loin, elles n'eſtoient pas ſi-toſt ſorties, qu'elles r'entroient auſſi-toſt, & ſe r'enfermoient dedans leur coque: Cela s'appelle, SIRE, eſtre iuſtifié par la bouche meſme de ceux qui nous accuſent; il n'en faut pas dauantage pour vous faire voir la bonté de noſtre cauſe, la fidelité de vos Sujets, le zele de voſtre peuple, & l'innocence du Parlement, lequel n'ayant leué des ſoldats que pour maintenir voſtre Perſonne ſacrée dans la puïſſance, & vos Sujets dans la ſoubeſſion & dans le calme; ſi neantmoins il a eſté obligé de faire des playes de peur d'en receuoir; d'offenſer, de peur d'eſtre offenſé; de tuer, de peur d'eſtre tué; de reſpandre le ſang de ceux qui vouloient reſpandre le ſien; il n'a offenſé qu'en ſe deffendant, & encore ç'a eſté avec tant d'irreſolution, de repugnance, & de douleur, que ie le pourrois iuſtement comparer en cecy à Marcellus dont parle ſainct Auguſtin au liure premier de la Cité de Dieu: Ce Prince, SIRE, eſtant ſur le point de gagner Syracuſe, & monté ſur vne haute Tour d'où il con-

temploit sa bonne fortune; comme il vid le choc, le chamaillis des armes, le sang qui couloit, la campagne ionchée de corps morts, il se mit à pleurer: Ainsi le Parlement forcé dans des rencontres qu'il ne peut éviter à moins que de se rendre criminel, & paroistre peu zelé & pour le Prince, & pour le peuple, ternissant le lustre & la beauté de ses Lauriers & de ses Palmes par des pleurs qui luy sont plus agreables que ses propres victoires; donne cent gouttes de larmes pour vne goutte de sang, marry que sa condition l'oblige à vaincre, ne pouuant vaincre que par la mort & la deffaire: Il pleure, SIRE, pendant quel l'Autheur de nos troubles & de nos miseres comme vn autre Neron regarde avec ioye au trauers de l'émeraude, c'est à dire, d'vne verte esperâce de nostre ruine, les combats de nos Athletes, repaist sa cruauté de leur sang, sa fureur de leurs blessures, sa rage de leurs douleurs, sa barbarie de leurs souspirs, sa vie de leur mort, pendant qu'il regarde les feux de la guerre qu'il a allumée par tous les cantons de vostre Royaume; qu'il le considere se deschirant soy-mesme avec plaisir de ses mains sanglantes par des factions domestiques, tirant son assurance de son desespoir, ses ris de ses larmes, son chant de ses sanglots, sa felicité de son mal-heur, & sa fortune de son tombeau.

En faut-il dire dauantage, SIRE, pour sa iustification & la defense de ce fameux Senat, quand la Nature, les Loix, vostre autorité, la doctrine, Dieu & les hommes n'auroient pas approuué leur procedé, ne le feroit-il pas assez par ces raisons? On l'a iugé si iuste, SIRE, que tous les Estats se sont ioints avec eux, & leur ont donné les mains: vos reuenus pilliez, vos Finances volées, vos peuples appauuïs, vos Prouinces desolées, vos Loix enfreintes, vostre autorité vsurpée ont donné sujet aux vns & aux autres de violenter leur humeur pour corriger celle d'vn mauuais Ministre, lequel abusant de vostre puissance estoit l'Autheur de tous nos maux: On n'a pas voulu, SIRE, suivre le conseil de Trajan. Cét Empereur offrant au premier President de sa Ville vne espée toute nue, luy dit: *Cape ferrum hoc & siquidem recte Imperium gessero pro me, sin autem contra me utere.* Niceph. l. 8. Hist. Eccl. c. 23. On a veu vostre Royaume & vostre Empire tres-mal administré; mais comme vous n'en estiez point la cause, & que vostre aage encore tendre & delicat vous dispensoit de regner par vous-mesme, & mettoit vostre Couronne en tutelle; vos Tuteurs se sont souleuez contre vos Ministres, le Parlement a pris les armes pour vous, & non pas contre vous, & escoutant avec

plus de raison cét aduis qu'un mauuais Conseiller donnoit à vn malheureux enfant reuolté contre son pere, qu'Architofel donnoit à Absalon armé contre Dauid : *Vnum virum tu queris & omnis populus erit in pace.* 2. Reg. 17. Voyant avec certitude & sans erreur que Mazarin estoit la cause de nos miseres & de nos troubles, & que tout vostre Estat ne pouuoit estre pacifié qu'en l'expulsant du Royaume selon la voix publique : il a pris les armes pour l'en bannir, toutes les Prouinces les ont prises pour cela, tous vos Parlemens pour ce suiet ont enuoyé des Deputez, toute la terre s'est remuée pour s'en deffaire : Vos ennemis mesmes, SIRE, ont demandé sa perte, quoy qu'il les obligeast à vos despens, tous les peuples, toutes les nations le sont venus chercher comme l'Autheur de leurs infortunes, dans le desir d'en faire vne victime publique, & de l'exposer à vn dernier naufrage pour calmer & adoucir les tempestes qu'il auoit excité par tout le monde; & par consequent, SIRE, estant vray, comme dit Xenophon, que le Monarque ne monte pas au Throsne pour auoir soin de soy-mesme, mais pour procurer le bon-heur & à la felicité & à ses Suiets : *Rex eligitur non ut sui ipsi is curam habeat, sed ut per ipsum qui illum elegerant in felicitatem viuant.* Que vostre Maiesté ne trouue point mauuais que vostre Parlement & vos Peuples ayent fait en ce rencontre ce qu'elle auroit non seulement approuué, mais encore commandé si elle auoit esté en aage de le faire: ils ont moins cherché leur bon-heur que vostre repos, le reestablisement de leur liberté que celuy de vostre puissance, ils ont eu plus de veuë des interets de vostre sacrée Personne que de tout ce qu'ils pouuoient souhaiter pour leur égard, puis qu'ils ont tout hazardé leurs biens, leur repos, leurs charges, leur liberté, leur vie, & tout ce que l'on peut dire pour le soustien & la protection de vostre auctorité, dont ils esperent que vostre Maiesté conseruera vne eternelle reconnoissance.

F I N.

Du 23. Mars.

1649.